



COMUNE DI SINNAI

COMUNU DE SINNIA

Tzitadi Metropolitana de Casteddu

REGULAMENTU DE SA BIBLIOTECA COMUNALI

Sumàriu

TÌTULU 1 ^u	3
ISTITUTZIONI E TAREAS DE SA BIBLIOTECA.....	3
Art. 1 Istituzioni de sa Biblioteca Comunali.....	3
Art. 2 Tareas de sa Biblioteca.....	3
Tìtulu 2 SERVÌTZIUS E ORGANIZATZIONI DE SA BIBLIOTECA.....	5
Art. 3 Servìtzius donaus.....	5
Art. 4 Azienda bibliotecària.....	5
Art. 5 Obèrrida a sa genti.....	6
TÌTULU 3 FINANTZIAMENTU E AMINISTRATZIONI.....	7
Art.6 Risorsas finantiàrias.....	7
Art. 7 Personali.....	7
TÌTULU 4 ORDINAMENTU DE AINTRU.....	9
Art. 8 Coidu de s’azienda.....	9
Art. 9 Tentura de su materiali bibliotecàriu.....	9
Art. 10 Registratzioni.....	9
Art. 11 Catalogatzioni.....	10
Art. 12 Inventàrius.....	10
Art. 13 Catàlogu eletrònicu in linia (OPAC) e servìtzius multimedialis.....	10
Art. 14 Revisioni de s’inventàriu.....	11
Art. 15 Collocatzioni.....	11
Art. 16 Scartus de su materiali documentàriu.....	11
Art. 17 Donatzionis e lassaduras.....	11
TÌTULU 5 SERVÌTZIUS A SA GENTI.....	13
Art. 18 Tareas.....	13
Art. 19 Maneras de partecipatzioni.....	13
Art. 20 Carta de is Servìtzius.....	13
Art. 21 Arrègulas de cumportamentu.....	14
Art. 22 Dèpiris de s’impreadori.....	14
Art. 23 Dèpiris de is operadoris.....	14
TÌTULU 6 SERVÌTZIU DE IMPRÈSTIDU.....	15
Art.24 Requisitus netzessàrius po s’imprèstidu.....	15
Art.25 Imprèstidu bia a atras istituzionis.....	15

Art. 26 Imprètidu interbibliotecàriu.....	16
Art. 27 Proibimentu de imprètidu.....	16
Art. 28 Maneras proceduralis po su servìtziu de imprètidu.....	16
Art. 29 Sinnaladura de difetus.....	17
Art. 30 Santzionis.....	17
Art. 31 Inditadoris de su livellu de calidadi de su servìtziu.....	18
TÌTULU 7° SETZIONIS SPETZIALIS.....	19
Art. 32 Denominatzioni.....	19
Art. 33 Setzioni stòriga.....	19
Art. 34 Setzioni piciocheddus.....	20
Art. 35 Mediateca.....	20
Art. 36 Educatzioni a s'impreu de is servìtzios Internet e <i>Opac</i>	21
Art. 37 Òbligus alliongius cun s'imprètidu.....	21
Art. 38 Responsabilidadi po incumpridura.....	21

TÌTULU 1^u

ISTITUTZIONI E TAREAS DE SA BIBLIOTECA

Art. 1 Istituzioni de sa Biblioteca Comunali

Sa Biblioteca Comunali de Sinnia est stètia istituida de su Cunsillu Comunali cun Deliberatzioni N^u 5 de su 15.03.1969 cun sa boluntadi de apariciai unu logu de educatzioni permanenti a disposidura de is tzitadinus, de impelli s'interessamentu e sa partecipatzioni ativa a sa cultura, de favoressi totus is maneras de cooperatzioni po donai unu servìtziu mellus a sa genti de acòrdiu cun is inditaduras de sa Costitutzioni e pighendi cumentu sistema culturali de riferimentu is inditaduras de sa Lei regionali 14/2006 e de is allegas de su Manifestu Unesco apitzus de is bibliotecas. De làmpadas de su 2008 sa biblioteca traballat me is aposentus de sa ex domu comunali.

Cun sa setzioni stesiada de sa biblioteca anca est sa frazioni de Solanas benit apariciau su sistema bibliotecàriu urbanu de Sinnia.

Art. 2 Tareas de sa Biblioteca

Sa Biblioteca Comunali tenit sa tarea de donai a indonu a totus is tzitadinus, chene nisciuna strintura, unu servìtziu pùblicu de ligidura, cumentu trastu de fundòriu de imparamentu e de crescidura culturali e tzivili, cun sa arregòllida e sa chistidura de librus, giornalis, rivistas e de totus is trastus chi potzant agiudai a fai efetivu su deretu a su stùdiu e a sa circa. In manera particolari punnat a:

- a) spratzinai s'informatzioni cun scioberus de imparzialidadi e pluralismu ideali, culturali e religiosu;
- b) traballai impari cun is scolas chi ddoi funt in su Comunu impellendi iniziativa alliongiadas de promovidura e spratzinadura culturali cun is Direzionis e cun is Òrganus Cullegialis cun sa tarea de favoressi s'impreu prus profetosu de sa Biblioteca Comunali e de is Bibliotecas scolàsticas po parti de maistus e scientis;
- c) èssiri unu logu de riferimentu de importu mannu po sa genti chi at acabau sa scola asseguendi a issa una possibilidadi de adelantamentu e crescidura de sa cultura cosa sua;
- d) offerri in manera particulari a totus is tzitadinus sa possibilidadi de unu adelantamentu sighiu;
- e) cumpriri totus is abisòngius de istrutzioni e de sbèliu de dònna genia de tzitadinus e apariciai una alternativa profetosa a atras fainas po su tempus liberu;
- f) apariciai de dònna manera unu logu ativu multimediali de spratzinadura de sa cultura, puru, si acontessit, cullaborendi cun atras bibliotecas e cun assòtzius culturalis;
- g) asseguirai sa circa, sa còmpora, s'amparu e su gosu pùblicu de obras scritas a manu e imprentadas, cumenti puru de documentus de interessu locali e de atrus materialis multimedialis;
- h) coidai de sa programatzioni culturali, chistionendi in manera particulari de is atividadis de promovidura de sa ligidura e de sa animatzioni po sa pipialla, is piciocheddus, is famillias e is bècius.

Tìtulu 2 SERVÌTZIUS E ORGANIZATZIONI DE SA BIBLIOTECA

Art. 3 Servìtzius donaus

Is servìtzius de sa Biblioteca comunali funt:

- consultazioni e ligidura de is obras e de is documentus bibliogràficus, de is periòdicus, de su materialì àudio visivu;
- imprètidu a domu de is librus de sa biblioteca e imprètidu de librus de atras bibliotecas pùblicas;
- laboratòrius de animatzioni a sa ligidura;
- imprètidu a domu atruessu assòtzius culturalis e de voluntariau;
- promovidura de cunferèntzias, atòbius, arrexonus, amostaduras, auditzionis, proietzionis de film e dònna atrà atividadi chi cumprat a is tareas numenadas in s'art. 2 e a is interessus de su pùblicu chi est imbordigau.

Custas atividadis ant a podi èssiri fatas, casumai fessat netzessàriu, de manera on-line puru.

Art. 4 Asienda bibliotecària

S'asienda de sa biblioteca comunali est apariciu de:

- a) Materiali libràriu e documentàriu, chi imoi est furmau de prus de 41.500 librus, chi est in is arregòllidas de sa biblioteca a su tempus de spratzinadura de custu Regulamentu, e arriciu apustis atruessu de còmporas, arregalus o cuncàmbius, registrau de manera regulari aintru de s'inventàriu, chi bandint a fai parti de su demàniu culturali de su Comunu de Sinnia;
- b) Catàlogus, arcivus, bancas de datus chi pertocant a is arregòllidas de sa biblioteca o de atrus fundus documentàrius;
- c) Alàscias e trastus in dotatzioni a sa biblioteca.

Art. 5 Obèrrida a sa genti

S'obèrrida a sa genti de sa Biblioteca est cuncordada in duus turnus, unu a mengianu e s'atru a meri, sighendi cussu chi est prevìdiu de sa Regioni Autònoma de Sardìnnia po is bibliotecas de enti locali cun prus de 15.000 bividoris. Is oràrius de obèrrida funt apicaus intrendi in sa bibliotecva e dònna annu benint spratzinaus beni. Si ant a acontèssiri mudàntzias de oràriu e arrèscidas de su servìtziu ant a èssiri scoviadas a totus is impreadoris cun avisus postus a s'inforas e aintru de sa biblioteca, cumentu puru imperendi is òrganus de informatzioni de su logu.

TÌTULU 3 FINANTZIAMENTU E AMINISTRATZIONI

Art.6 Risorsas finantziàrias

A is gastus po su funtzionamentu de sa Biblioteca su Comunu s'at a infrentai:

- 1) cun unu tanti chi s'Aministratzioni Comunali si imbòrdigat a finantziai dònna annu po sa Biblioteca e chi at a podi èssiri amanniada castiendi is apretus de sa Biblioteca cunforma a is disponibilidadis de su Balanzu Comunali;
- 2) cun is agiudus de sa Regioni Sarda;
- 3) cun is donatzionis e cun is agiudus chi Entis Pùblicus e tzitadinus privaus ant a fai cun custa tarea;
- 4) cun s'agiudu eventuali de is impreadoris.

Art. 7 Personali

Sa gestioni biblioteconòmica e amministrativa de sa biblioteca, pensada cumenti servìtziu pùblicu locali de su comunu, imoi benit fata cun personali spetzializau imperendi sa manera “in economia”, cunforma a s'art. 113 - comma 1 lèt. A) de su D. Lgs. 267/2000. Sa cumpridura de su servìtziu de imprètidu a sa genti e sa catalogatzioni de is documentus at a podi èssiri puru afillada in arrendu a una Dita de aforas chi tenit is operadoris califficaus chi ant a agiudai a su personali de s'enti;

S'impreu de voluntàrius eventualis de acostiai a su personali chi traballat est arregulau de cunventzionis particularis de stages o novitziau cuncordaus intre su Comunu e is Universidadis e is scolas superioris o cun assòtzius.

In prus podint èssiri presentis cumenti agiudu picicocu chi funt fendi su servìtziu tzivili natzionali.

In su tempus de su servìtziu su personali portat sempri unu cartelleddu de arreconnoscimentu e in is comunicatzionis personalis o telefònicas si depit sempri presentai cun nòmini e sangunau cosa sua.

TÌTULU 4 ORDINAMENTU DE AINTRU

Art. 8 Coidu de s'asienda

Totu s'asienda chi ddoi est in sa Biblioteca est afillada po su coidu, sa crescidura, sa chistidura e sa fruitzioni prena a su funtzionàriu responsàbili chi ndi torrat sceda bia a s'Aministratzioni Comunali. Su funtzionàriu responsàbili, donat informatzions dònna annu a sa Cumissioni apitzus de su caminu de su servìtziu.

Art. 9 Tentura de su materiali bibliotecàriu

Su materiali documentàriu di proprietadi de sa Biblioteca depit tenni:

- 1) imprentau in su frontispìtziu de sa obra unu bullu cun su nòmini de sa Biblioteca;
- 2) in una pàgina scioberada unu timbru lineari chi amostat sempri su nòmini de sa Biblioteca;
- 3) in s'ùrtima pàgina bona de su libru (innantis de s'ìndixi) unu timbru chi amostit cussu puru su nòmini de sa Biblioteca cun su nùmeru chi ddus iscrit in su registru de intrada.

Art. 10 Registratzioni

Totus is obras chi intrant a fai parti de s'asienda de sa Biblioteca depint èssiri arregistradas, deretu candu intrant, in un registru regulari chi ddas nùmerat de manera progressiva in òrdini cronològicu de intrada. Su nùmeru de su registru depit èssiri arpetiu in prus chi in sa obra puru in sa scheda de su catàlogu topogràficu.

Art. 11 Catalogatzioni

A pustis de sa registratzioni contada in s'artìculu de innantis, su libru, su librieddu, sa obra enciclopèdica, ecc. depit èssiri catalogau sighendi is arrègulas impreadas me is Bibliotecas pùblicas italianas e classificau sighendi su sistema C.D.D. (classificadura Decimali Dewey). Sa classificadura benit marcada in prus chi in sa scheda de is catàlogus puru in sa schina e aintru de sa copertina de sa obra e totu. Sa collocatzioni me is stantis, sighendi sa classificadura po allefas mannas, at a èssiri ghiada de sa tarea de sa funtzionalidadi màssima.

Art. 12 Inventàrius

Sa Biblioteca chistit e adelantat po impreu de aintru inventàrius e registros: registru cronològicu de intrada (o inventàriu), registru de is obras pèrdias, o sciusciadas o fuliadas, schedàriu de is iscritus a s'imprèstidu, schedàriu de is obras chi si podint imprestai, registru de is firmas de is presèntzias.

S'inventàriu podit èssiri arrempraus de is imprentadas apariciadas de su elaboradori. Custas imprentadas depint èssiri rilegadas in unu libru dònna tanti.

Art. 13 Catàlogu eletrònicu in lìnìa (OPAC) e servìtzius multimedialis

Sa Bibiolteca assegurat a totus sa consultatzioni libera e a indonu de su catàlogu tzerriau OPAC: sigla chi pertocat a su Catàlogu in lìnìa de sa Biblioteca a disposidura de totus.

In Biblioteca a su mancu unu logu de consultatzioni est chistiu, chene formalidadi, a sa consultatzioni lèbera de is catàlogus in lìnìa.

Su catàlogu si podit ligi puru de is computer personalis intrendi in internet a sa banca datus apòsita chi at a èssiri spratzinada in dònna logu, de aundi at a èssiri possìbili fai is prenodaduras de domu.

Art. 14 Revisioni de s'inventàriu

Me is inventàrius est proibiu meda arrasigai e scancellai cun àcidus. Is curregiduras ant a depi èssiri fatas de colori arrùbiu de manera chi si potzat ligi ita ddoi fiat scritu ainnantis e cun una nota firmada po parti de su Responsàbili de su Servìtziu de Aintru de sa arresoni de cussa scancelladura.

Is unidatis bibliogràficas , documentàrias e audiovisivas inventariadas de manera costumada chi potzant èssiri pèrdias, bogadas de is arregòllidas o chi no ant torrau a sa Biblioteca comunali ant a èssiri sinnaladas in listas apòsitas apariciadas e scarrigadas de is registrus de inventàriu cun deliberatzioni de sa Giunta.

Cun sa tarea de apariciai is listas numenadas, si fessat netzessàriu, sa Biblioteca at a podi èssiri serrada po 15 diis in unu tempus de s'annu scioberau de su Responsàbili de su Servìtziu e de dònna maniera scioberau intre is tempus de intrada prus pitica e donendi una informatzioni lestra.

Art. 15 Collocatzioni

Totus is librus depint tenni s'inditadura de su logu ocupau in is stantis. Sa cuncordadura at a depi èssiri fata cun conca, de manera de ndi simprificai sa consultazioni e sa movidura.

Art. 16 Scartus de su materiali documentàriu

Su materiali documentàriu chi no tenit genia arrara o de primori chi, chene cumpriri prus a sa funtzioni informativa po gradu fisicu o beciùmini, at a depi èssiri bogau de s'asienda de sa biblioteca sighendi is maneras previdias.

Art. 17 Donatzionis e lassaduras

A sa agradèssida de donatzionis o lassaduras eventualis bia a sa biblioteca providit sa Amministratzioni comunali cunforma a sa lei, ascurtau su parri de su responsàbili de su servìtziu.

Po is donatzionis de obras a solas o de dònna manera chi no faint parti de unu fondu aguali, providit deretu su Responsàbili de su servìtziu atruessu de sa modulìstica apòsita.

TÌTULU 5 SERVÌTZIUS A SA GENTI

Art. 18 Tareas

Is servìtzius de sa Biblioteca comunali funt liberus, a e badas, obertus a totus e tenint sa strintura sceti de s'arrespetu de su deretu de fruitzioni po parti de is impreadoris e in s'apretu de amparu e chistidura de s'asienda.

Is maneras de intrada a is aposentus de sa Biblioteca funt cuncordadas de su personali de Biblioteca. In is aposentus depit èssiri pompiau su citiori e su cumportamentu depit èssiri cussu de no strobai a is atrus ligidoris o de no sciusciai is documentus, is trastus e is alàscias. In totus is aposentus est proibiu fumao. Est possìbili pompiai allutus is telèfonus cellularis cun sa manera muda.

Art. 19 Maneras de partecipazioni

Is impreadoris podint inditai sa còmpora de librus e trastus multimedialis chi no funt de sa biblioteca imperendi sa modulistica apòsita. Est possìbili presentai dònna atra genia de propònnida chi potzat amellorai su servìtziu.

Art. 20 Carta de is Servìtzius

Sa Biblioteca impreat una “Carta de is servìtzius” chi arrègulat is relatas intre sa Biblioteca e is impreadoris, cun sa tarea de fai prus simpri e crara sa fruitzioni de is servìtzius e de ndi cuncordai a lestru is maneras e is genias de intrada, is oràrius, is gastus eventualis e is tempus de fruitzioni.

Art. 21 Arrègulas de cumportamentu

In Biblioteca is operadoris e is impreadoris ant a depi pompiai unu arrecatamentu chi no potzat ocasionai niscunu strobu a is presentis e a sa cumpridura costumada de is servìtzius. Est a scioberu de su responsàbili de su servìtziu a sa genti bogai a foras e sa biblioteca deretu a chinisiat no pongat menti a custa disposidura. Totus is servìtzius ant a depi èssiri impreaus de is impreadoris sighendi sa tarea insoru e is maneras cumandadas, in is logus scioberaus po cussus. Est permìtia sa ligidura e sa consultazioni de is materialis de sa Biblioteca.

Art. 22 Dèpiris de s'impreadori

Is impreadoris depint impreai is librus, is documentus e is atrus materialis, me is aposentus de sa biblioteca a domu, cun su coidu e su smeru màssimu. Est priobiu meda fai marcaduras o scriri cosa de calisiat genia me is librus e is atrus materialis, cumentu puru straciulai o segai is pàginas. Chinisiat chi addannit materialis, alàscias o trastus de sa biblioteca depit aconciai su dannu, siat arremprasendi is cosas sciusciadas o pèrdias cun atras agualis, siat cun sa smenda de dinai, carculada cun su balori de mercau de is cosas adannadas o pèrdias.

Art. 23 Dèpiris de is operadoris

Su personali incarrigau de su servìtziu a sa genti assegurat sa consulèntzia bibliogràfica, ghiat s'impreadori a s'impreu mellus de sa biblioteca e a sa consultazioni de is catàlogus, càstiat e cuncordat s'intrada de is impreadoris a totus is setzionis e favoressit s'impreu currìgiu de is materialis.

TÌTULU 6 SERVÌTZIU DE IMPRÈSTIDU

Art.24 Recuisitus netzessàrius po s'imprèstidu

Funt amìtius a s'imprèstidu totus cussus chi ddu pedint, donendi is datus anagràficus cosa sua, s'indiritzu, sa casitedda de curreu eletrònicu certificau si dda tenint, sa casitedda de curreu costumau e su recàpitu telefònicu, cun sa presentada de unu documentu de identidadi legali is calis datus ant a èssiri scritus in sa scheda personali apòsita. Is minoris de edadi ant a podi èssiri amìtius a s'imprèstidu a pustis de sa decrarazioni de responsabilidadi firmada de su babu e sa mama.

Cussus chi no bivint in Sinnia, a foras de cussus chi funt studiendi o traballendi in tzitadi, ant a podi gosai de s'imprèstidu a pustis de su permissu de su Responsàbili de su Servìtziu. A totus is impreadoris at a èssiri donada una tèssera personali. Si benit pèrdia, s'impreadori ddu depit nai deretu cun comunicatzioni scritta. Su ligidori depit fai sciri deretu si acontessint mudàntzias de residèntzia o de telèfonu.

Tratamentu de is datus personalis

Cun sa firma de su mòlliu de iscritzioni a s'imprèstidu s'impeadori donat su permissu a su tratamentu de is datus personalis cosa sua cunforma a su Regulamentu (UE) n. 2016/679 "GDPR".

Su tratamentu de is datus personalis po parti de sa biblioteca est finalizau a sa cumpridura de is fainas istituzionalis previdias de custu regulamentu e a sa apariciadura de is indiritzàrius po sa promovidura de is manifestadas de sa biblioteca e totu.

Art.25 Imprèstidu bia a atras istituzionis

Sa Biblioteca, in prus chi a is impreadoris a solus, podit donai in imprèstidu librus e atrus materialis a is scolas e a is organizatzionis culturalis, sotzialis e de educatzioni permanenti. Is Entis chi pedint

s'imprètidu funt garantis de s'amparu e de sa chistidura profetosa de su materiali e si imbòrdigant a ndi impelli s'impreu chene tareas de godàngiu.

Art. 26 Imprètidu interbibliotecàriu

Sa Bibliotea fait s'imprètidu interbibliotecàriu a pustis de pedidura e sighendi sa tarea de retziprotzidadi.

Art. 27 Proibimentu de imprètidu

De costumàntzia funt bogaus de s'imprètidu: a) is enciclopedras, is ditzionàrius e is obras de consultazioni in generali; b) librus de impreu prus mannu in s'apostu de ligidura; c) is giornalis e is periòdicus; d) totus is librus, libriteddus e rivistas chi si podint cunsiderau arrarus o de primori, cunsideraus aici po parti de sa Cumissioni numenada in s'art. 7, prus chi totu cussus chi ddoi funt in sa setzioni stòriga. De totus is obras chi funt aforas de s'imprètidu si depit apariciai unu elencu de amostai.

Art. 28 Maneras proceduralis po su servìtziu de imprètidu

Su servìtziu de imprètidu at a depi èssiri cuncordau in sa manera chi sighit:

- Càstiu de sa tèssera de iscrizioni de s'impreadori;
- Registratzioni de s'imprètidu acontèssiu me is schedas apòstas e in su computer;
- Torrada de su materiali e cunfracfirma po parti de s'impreadori in sa scheda po sa torrada cunfrimada;
- Re-collocatzioni dereta de su materiali;

- Averiguadura dònnaì cida de is librus chi no ant torrau, in acontèssiu de impreadoris incumpridoris at a depì èssiri cumpriu cussu cumandau de su regulamentu e sa normativa vigenti.

S'imprètidu a domu est permittiu po no prus de duas obras a borta po unu impreadori a solu. Su tempus costumau de s'imprètidu po is librus est de 15 diis. Po is librus prus pedius su tempus de s'imprètidu podit èssiri puru prus piticu. S'impreadori si ndi tenit abisòngiu podit pediri su perlongu de atras 15 diis, de pediri cun sa iscritzioni regulari de su libru o de is librus sceti si no funt stètius pedius de atra genti.

Est proibiu afillai a atrus is obras arricias in imprètidu. Est prevèdiu puru s'imprètidu a domu de materiali audiovisivu po 5 diis e finsas a tres documentus.

Art. 29 Sinnaladura de difetus

Po dònnaì libru benit amostau in su software de gestioni su stadi de chistidura: s'impreadori chi arricit in imprètidu a una obra depit scrucullai si est totu intrea e depit fai sciri luegus a su personali incarrigau, po no èssiri incurpau issu, is difetus e is guastus chi at pòtziu agatai.

Art. 30 Santzionis

Su ligidori chi no at a torrai in su tempus cumandau is obras est suspèndiu de s'imprètidu po unu nùmeru de diis aguali a su tradu chi at tentu respetu a sa dii chi ddu depiat torrai, finsas a unu màssimu de trintunu diis. A pustis de sa trintunu dii de tradu s'impreadori depit pagai una multa de € 1,00 po dònnaì dii de tradu amuntonada finsas a sa dii de torrada, finsas a unu tanti màssimu de su dòpiu de su prètziu de mercau de su libru (chistionendi de su prètziu de imoi de copertina po is obras in cumèrciu o su balori carculau de unu espertu po is obras chi funt a foras de produssidura).

A s'impreadori chi at a perdi sa obra arricida in imprètidu o chi dda torrat sciusciada est imbiau, cun arregumandada cun avisu de arricida, o cun sa pec, o atru mesu acònciu, s'imbiu de arremprasai o de aconciai sa obra chi, a parri de su responsàbili de su servìtziu, podit acontèssiri cun unu atru libru de sa pròpia editzioni, cun una editzioni differenti ma cun sa matessi interesa e bisura tipogràfica simbillanti o, si custu no fessat possìbili, a donai su tanti dòpiu de su prètziu de mercau de su libru. Passadas chene profetu trinta diis de sa arricida de cussu inditadura de su comma de innantis, aundi no iant a acontèssiri arresonis de strobu chi no funt crupa de cussa persona, s'impreadori incumpridori est bogau a foras de sa afitianadura de sa Biblioteca, est sinnalau a su Ministeru po si Benis e is Atividadis culturalis po sa bogadura de totus is bibliotecas pùblicas de su Stadu, cumentu puru a is Bibliotecas de sa provìntzia de Casteddu, e podit èssiri denuntziau de sa autoridadi giuditziària si s'at a arreselai sa ipòtesi de reatu.

Art. 31 Inditadoris de su livellu de calidadi de su servìtziu

Sa biblioteca si imbòrdigat a amellorai a pagu a pagu sa calidadi de servìtzius cosa sua. Is inditadoris de fundòriu de su profetu de su servìtziu funt:

- circa e agatadura de su libru prenodau poita est giai imprestau;
 - agatadura de is librus sinnalaus de is impreadoris e noas libràrias;
 - nùmeru de is catalogaduras;
 - nùmeru de is imprètidus in unu annu;
 - progetus de cooperatzioni cun sa scola;
 - atividadis culturalis e laboratòrius promòvias de sa biblioteca;
 - progetus e stages de alternàntzia scola traballu cun is scolas superioris;
- entrega de su preguntàriu periòdicu de valutatzioni de su servìtziu;

TÌTULU 7° SETZIONIS SPETZIALIS

Art. 32 Denominatzioni

Si cunsiderant “Setzionis Spetzialis”, poita benint impreaus stremus particularis de ordinamentu e impreu:

- 1) Setzioni Sardìnnia;
- 2) Setzioni stòriga, de librus antigus, rarus e de primori;
- 3) Setzioni materiali periòdicu;
- 4) Setzioni piciocheddus;
- 5) Setzioni audiovisivus;
- 6) Setzioni Tesis de Làurea de is Sinniesus;
- 7) Setzioni Mùsica
- 8) Mediateca (progetu RAS “All-in”)
- 9) Ipovedentis (progetu “Ligi simpri, ligi totus”)
- 10) Setzioni Arti

Atras setzionis spetzialis chi ant a podi èssiri apariciadas sighendi is progetus specìficus.

Art. 33 Setzioni stòriga

Su materiali de sa setzioni stòriga depit èssiri entregau a chini ddu pedit po sa consultatzioni cun pedidura scritta in unu mòlliu apòsitu, a pustis de sa autorizatzioni de su responsàbili de su servìtziu. Totu su materiali de sa setzioni stòriga est bogau de su imprèstidu a domu, de dònna manera at a podi èssiri impreau po amostaduras e iniziativas culturalis.

Art. 34 Setzioni piciocheddus

Su servìtziu de ligidura apariciu in sa Setzioni Piciocheddus de sa Biblioteca est cuncordau castiendi is apretus specìficus de sa fàscia de edadi de is impreadoris chi funt imbordigaus. Custu balit po is caraterìsticas de is alàscias, po cussas de sa classificadura e de sa collocatziòini, e po is maneras de interbènnida de is operadoris.

Sa Biblioteca cumprit unu servìtziu de fundòriu po is impreadori de edadi intre is 0 e is 14 annus, po is calis apariciat una asienda bibliogràfica e documentària manna meda. S'imprètidu de is documentus acontessit cun is pròpias maneras amostadas in is puntus innantis (art. 28).

Sa Biblioteca cullàborat impari cun is scolas de su territòriu in sa apariciadura de progetus chi tèngiant sa tarea de spratzinai sa ligidura in mesu a is piciocheddus. S'imprètidu a is classis previdit chi su nùmeru de is librus e su tempus de cussu bèngiat acordau cun is imparadoris.

Art. 35 Mediateca

Aintru de sa Biblioteca benit dpnau puru su servìtziu de consultatzioni informatizada, cun sa tarea de cumpriri is apretus culturali se de informatzioni de sa comunitadi de su logu e de is impreadoris e de amellorai a amanniai sa ofèrrida informativa cosa sua, aciungendidda a is fontis de paperi e multimedialis costumadas.

Sa Biblioteca ponit a disposidura de is impreadoris cincu logus multimedialis de su progetu all-in destinadas a sa alliongiadura a s'arretza Internet, a sa consultatzioni de is bancas datus.

Cussus prus piticus de 18 annus ant a depi tenni su permissu de unu de is genitoris.

Art. 36 Educatzioni a s'impreu de is servìtzius Internet e Opac

S'agiudu e sa consulenza lestra po parti de is bibliotecàrius est dereta candu su tanti de su pùblicu ddu permitit. De dònna manera est assegurau s'agiudu po circas bibliogràficas simpri e po aconciai sa funtzionadura de is trastus. Po strobis chi podint pertocai a is programmas gestionalis est dereta sa pedidura de interbènnida de is servìtzius tènnicus.

Sa Biblioteca no est responsàbili de sa calidadi de is informatzionis circadas in Internete no tenit nimancu sa possibilidadi de castiai sa calidadi de is risorsas postas a disposidura in dònna momentu.

In acotèssiu de arrèscidas de su servìtziu po arresonis chi no pertocant a sa Biblioteca, su personali si imbòrdigat a ndi donai comunicatzioni lestra a is Impreadoris.

Art. 37 Òbligus alliongiaus cun s'imprètidu

S'icritzioni a s'imprètidu ocasionat sa agradèssida intrea de is disposiduras chi funt aintru de custu regulamentu, chi depit èssiri amostau a is impreadoris.

Art. 38 Responsabilidadi po incumpridura

La farta de sighidura de is cumandus de is artìculus 21, 24, 28, 30 de custu Regulamentu ocasionat sa stesiadura de s'impreadori de sa Biblioteca e sa bogadura interina de s'impreu de is servìtzius.

Sa bogadura finsas a unu annu podit èssiri cumandada de su Responsàbili de su Servìtziu. In acotèssiu de recaida o po dannus ocasionaus a is materialis o po una tenta de fura de benis de propiedadi de sa Biblioteca o po atras crupas grais aici, a foras de su stremu penali, cun is matessi proceduras, est cumandada perou sa bogadura definitiva de is servìtzius de sa biblioteca, de entregai in is acotèssius de s'art. 30.